

SOALAN NO: 376

PEMBERITAHUAN PERTANYAAN BAGI JAWAPAN BERTULIS
MESYUARAT KEDUA, PENGGAL KEEMPAT,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN: BERTULIS

DARIPADA: YB DR. HAJAH SITI MARIAH BINTI MAHMUD

TARIKH:

SOALAN:

Dr. Hajah Siti Mariah binti Mahmud [Kota Raja] minta **MENTERI SUMBER MANUSIA** menyatakan jumlah pencarum PERKESO dan berapa jumlah caruman sebulan dikutip. Setakat tahun berakhir 2015, berapa jumlah dana terkumpul /aset PERKESO semasa dan dari jumlah ini berapa jumlah yang dilabur dalam syarikat tersenarai di bursa saham, berapa yang dipinjamkan kepada Kerajaan dan untuk tujuan apakah dipinjamkan.

PR-1342-T75226

JAWAPAN:

Tuan Yang Di Pertua,

1. Untuk makluman Dewan Yang Mulia ini, jumlah pencarum PERKESO sehingga 31 Disember 2015 ialah 6.3 juta dengan jumlah caruman yang dikutip sebanyak RM2,838.33 juta. Manakala jumlah dana terkumpul PERKESO adalah sebanyak RM23,860.38 juta, dan daripada jumlah tersebut sebanyak RM3,870.88 juta telah dilabur dalam syarikat tersenarai di bursa saham.

2. Aktiviti pelaburan PERKESO diurus tadbir berdasarkan garis panduan pelaburan PERKESO yang diluluskan oleh Kementerian Kewangan Malaysia. Semua pelaburan PERKESO dilaksanakan setelah dipertimbang dan diluluskan oleh Panel Pelaburan PERKESO yang turut dianggotai oleh wakil-wakil majikan dan pekerja. Pendekatan pelaburan PERKESO dilaksanakan dengan teliti bertujuan memastikan "*capital preservation*" sebagai keutamaan. Setakat ini, pelaburan yang dibuat kepada syarikat kerajaan adalah dijamin sepenuhnya oleh kerajaan.

PEMBERITAHUAN PERTANYAAN DEWAN RAKYAT

PERTANYAAN : BUKAN JAWAB LISAN
DARIPADA : Y.B DR. HAJAH SITI MARIAH BT MAHMUD
SOALAN : NO. 377

Dr. Hajah Siti Mariah binti Mahmud [Kota Raja] minta **MENTERI PENDIDIKAN TINGGI** menyatakan jumlah pengangguran graduan universiti dan langkah Kerajaan untuk menangani masalah pengangguran golongan terpelajar ini. Adakah Kerajaan menjalankan apa-apa kajian untuk mengenal pasti punca dan masalah yang dihadapi ini.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan Sistem Kajian Pengesanan Graduan (SKPG), yang diisi semasa konvokesyen menunjukkan graduan (warganegara) yang masih belum bekerja pada tahun 2015 adalah sebanyak 23.9 peratus. Antara sebab graduan masih belum bekerja adalah kerana sedang mencari pekerjaan, ingin berehat; sedang menunggu penempatan untuk melanjutkan pengajian; mempunyai tanggungjawab terhadap keluarga; kurang keyakinan diri untuk bekerja; memilih untuk tidak bekerja; tidak berminat untuk bekerja dan mempunyai masalah kesihatan.

Tuan Yang di-Pertua,

Kementerian Pendidikan Tinggi telah melaksanakan inisiatif strategik dalam membantu graduan meningkatkan keupayaan bagi persediaan diri dalam pekerjaan. Antaranya, ialah:

(i) Pelaksanaan Program Kebolehpasaran Graduan [Graduate Employability (GE)] untuk meningkatkan nilai tambah graduan dari aspek kelayakan profesional, keterampilan diri dan sahsiah untuk membantu graduan memperoleh pekerjaan yang sesuai dengan kelayakan serta bersesuaian dengan keperluan industri.

(ii) Membangunkan Rangka Kerja Penjana Pekerjaan (*Job Creator Framework*) telah dibangunkan oleh KPT dengan tujuan untuk mengubah minda graduan daripada *job seeker* kepada *job creator*. Antara program yang telah dilaksanakan ialah usahawan siswa di mana mahasiswa digalakkan untuk berniaga di dalam dan luar kampus. Selain itu, program sangkutan dan bimbingan dengan kerjasama Permodalan Usahawan Nasional Berhad, TERAJU, Perbadanan Pembangunan Teknologi Malaysia dan lain-lain juga dilaksanakan.

(iii) Pelaksanaan Purata Nilai Gred Kumulatif Bersepadu [*Integrated Cumulative Grade Point Average (iCGPA)*] telah diperkenalkan pada September 2015 yang mana ia merupakan pendekatan baharu dalam penilaian pelajar. iCGPA melaporkan pencapaian holistik pelajar yang bukan hanya mentaksirkan pelajar berdasarkan pencapaian akademik semata-mata tetapi pelajar juga ditaksir dari segi keusahawanan, kemampuan pengurusan, kemahiran sosial dan kemahiran berkomunikasi.

(iv) Pengenalan *CEO Faculty Programme* di mana pelajar-pelajar didedahkan dengan syarahan dan berinteraksi dengan tokoh-tokoh korporat daripada Syarikat Berkaitan Kerajaan, industri terkemuka dan pegawai tinggi Perkhidmatan Awam. Antaranya, adalah Tan Sri Dr Ali Hamsa, Ketua Setiausaha Negara, Tan Sri Tony Fernandes, Group CEO Air Asia dan Tan Sri Johan Jaafar, Chairman Nobel International School. Program ini juga akan membantu menambah baik kurikulum dan meningkatkan kolaborasi antara akademia dan pihak industri.

(v) Memperkenalkan Program 2u2i yang merupakan program *work based learning* (belajar sambil bekerja) di mana pelajar akan belajar selama 2 tahun di universiti dan selama 2 tahun lagi menimba pengalaman di industri. Program ini akan ditawarkan oleh Universiti Malaysia Kelantan melalui Sarjana Muda Keusahawanan dengan Kepujian dan Universiti Putra Malaysia melalui Bacelor Sains Pengurusan Perladangan mulai September 2016.

(vi) Kepentingan penguasaan bahasa Inggeris dalam keperluan pasaran telah menggerakkan UA untuk turut menggabungkan kelayakan penguasaan bahasa Inggeris sebagai salah satu langkah untuk meningkatkan kualiti graduan sesuai

dengan permintaan dan kehendak pasaran kerja di peringkat nasional dan antarabangsa. Peratusan pencapaian *Malaysian University English Test* (MUET) Band 3 dan ke atas bagi Sesi Akademik 2015/2016 adalah sebanyak 62.87% berbanding 35.02% bagi sesi 2014/2015. Ini menunjukkan satu peningkatan dan lonjakan yang sangat ketara iaitu sebanyak 27.85%.

Melalui program-program tersebut, KPT berkeyakinan pelajar akan dapat meningkat penguasaan *soft skills* serta mempunyai pengetahuan, kemahiran serta sikap yang sesuai untuk bekerja, selain daripada mempunyai keyakinan untuk menceburi bidang keusahawanan.

PEMBERITAHUAN PERTANYAAN DEWAN RAKYAT

PERTANYAAN : BUKAN LISAN

**DARIPADA : YANG BERHORMAT DR. HAJAH SITI MARIAH
BINTI MAHMUD [KOTA RAJA]**

SOALAN :

YB Dr. Hajah Siti Mariah binti Mahmud [Kota Raja] minta **PERDANA MENTERI** menyatakan projek-projek yang telah dilaksanakan di Parlimen Kota Raja dari tahun 2013 hingga sekarang berserta dengan kosnya.

JAWAPAN: YB DATO' SRI AZALINA BINTI DATO' OTHMAN SAID

MENTERI DI JABATAN PERDANA MENTERI

Tuan Yang di-Pertua,

Untuk makluman, Kerajaan Persekutuan telah meluluskan 19 projek khusus untuk dilaksanakan di Parlimen Kota Raja dalam tempoh 2013 hingga 2016. Sebanyak RM26.01 juta telah diperuntukan di bawah *Rolling Plan* Ketiga Rancangan Malaysia Ke-10 (RMKe-10) (2013-2014), RM22.06 juta telah diperuntukan di bawah *Rolling Plan* Keempat RMKe-10 (2014-2015), RM9.08 juta diperuntukkan di bawah *Rolling Plan* Keempat RMKe-10 (2015) dan RM1.69 juta diperuntukkan di bawah *Rolling Plan* Pertama RMKe-11 (2016-2017).

Sekian. Terima kasih.